

■ TRIBUNA POLITICA

Revisiun totala da la lescha chantunala dal dretg da burgais

DA CHRISTIAN RATHGEB,
CUSSEGLIER GUVERNATIV

Cun la nova lescha chantunala dal dretg da burgais, che regla l'acquist e la perdita dal dretg da burgais chantunal e communal, vegnan realisadas adattaziuns al dretg federal revedì ed als basegns da la pratica. Ina materia sitga, pudess ins pensar. Efectivamain dentant ina tema emoziunal.

Las naturalisaziuns èn a medem temp ina da las incumbensas las pli distinguidas e pretensiusas d'ina corporaziun. Tgi duai vegnir recepì sut tge cundiziuns cun tut ils dretgs e cun tut las obligaziuns en l'atgna communitad? Ina tematica che po tuttavia chaschunar grondas emoziuns. Relativamain quiet èsi dentant stà ils 13 da zercladur da quest onn en il cussegl grond, nua che las deputadas ed ils deputads han gù da decider davart la revisiun totala dal dretg da burgais grischun. La lescha è vegnida acceptada senza cuntravuschs. Sco ingredienza la pli impurtanta dal «recept da la lescha» po bain vegnir numnà il fatg che la politica da naturalisaziun cumprovada è vegnida mantegnida da princip en connex cun la populaziun estra. Ultra da quai è la revisiun totala dentant vegnida cundida cun intginas novaziuns, ed areguard la sistematica è ella vegnida



preparada uschia, ch'ella è in pau pli digestibla.

Aduas da questas novaziuns vulesch jau render attent spezialmain en quest lieu: d'ina vart il dretg da burgais d'onur e da l'autra vart il dretg da burgais suenter fusiuns da vischnancas.

Cun la revisiun vegni per l'emprima giada fixà explicitamain che las vischnancas ed il chantun pon – independentamain in da l'auter – sa mussar engraziavels per meritis correspondentis a favur da la communitad cun surdar in dretg da burgais d'onur. En quest connex vegni differenzià tranter in dretg da burgais d'onur communal che ha consequenzas per il stadi civil ed in dretg da burgais d'onur communal u chantunal che n'ha nagin effect sin il stadi civil e che na vegn pia betg inscrit en il passaport.

Da l'inscripziun en il passaport sa tracti er

tar la segunda novaziun, il dretg da burgais suenter fusiuns da vischnancas.

Questa novaziun sa drizza a tut las Grischunas e tut ils Grischuns che han survegnì in nov lieu d'origin suenter ina fusiun da vischnancas. Ultra da singulas vischnancas burgaisas ha cunzunt er la federaziun da las vischnancas burgaisas dal Grischun rendì attent che tschertas burgaisas e tscherts burgais resentian la stritgada dal lieu d'origin, ch'è per part collià dapi tschientaners cun lur num da famiglia, sco perdita d'ina part da lur identitad. Cun agid d'ina midada en la lescha da vischnancas, ch'è vegnida fatga a medem temp sco la revisiun totala, ha quai pudì vegnir mess en urden. Persunas interessadas vegnan uschia a pudair dumandar las autoritads dal stadi civil da laschar inscriver – cunter ina taxa – davos il nov lieu d'origin en parantesas la designaziun da lur anteriur lieu d'origin. Quest supplement vegn lura ad esser visibel er en il passaport e sin la carta d'identitad. Sch'i na vegn fatg nagin referendum cunter la lescha entaifer il termin da trais mais, cumenza previsiblamain a partir da l'onn proxim ina fasa da trais onns, entaifer la quala ins po dumandar il supplement en parantesas. Jau sun fitg spanegià, quantas Grischunas e quants Grischuns pertutgads che vegnan a far diever da questa pussaivladad.